

**NO. SOALAN: 211**

**PEMBERITAHUAN PERTANYAAN BAGI BUKAN JAWAB LISAN  
DEWAN RAKYAT**

**PERTANYAAN : BUKAN JAWAB LISAN**

**DARIPADA : TUAN JEFF OOI CHUAN AUN  
[ JELUTONG ]**

**RUJUKAN : 8723**

**SOALAN:**

**Tuan Jeff Ooi Chuan Aun [ Jelutong ] minta MENTERI DALAM NEGERI menyatakan butir-butir lengkap mengenai anggota-anggota ISIS yang telah ditawan setakat ini. Apakah kejayaan dalam proses pemulihan terhadap mereka supaya bencana pengganas agama ekstrim ini tidak menular.**

**JAWAPAN:**

**Sehingga 25 Februari 2016, Polis Diraja Malaysia (PDRM) telah berjaya menangkap seramai 160 orang yang terlibat dengan elemen kumpulan pengganas Daesh di negara ini yang ditahan di bawah Akta Kesalahan Keselamatan (Langkah - Langkah Khas) 2012 (SOSMA 2012), Akta Pencegahan Jenayah 1959 (POCA 1959) dan Akta Pencegahan Keganasan 2015 (POTA 2015). Walau bagaimanapun, saya tidak berhasrat untuk mendedahkan secara terperinci maklumat tersebut agar tidak mengganggu siasatan pihak polis.**

**Berhubung kejayaan dalam program pemulihan individu yang terlibat dalam aktiviti keganasan dan memiliki ideologi ekstremis, Malaysia mempunyai rekod cemerlang yang mencatat kejayaan sebanyak 95% tahanan dapat dipulihkan sepenuhnya dan tidak kembali terlibat dalam aktiviti lampau yang menjelaskan keselamatan negara.**

**Kejayaan ini adalah hasil daripada pengalaman luas Kerajaan dalam menjalankan program-program pemulihan semasa menangani ancaman pengganas komunis yang meletak senjata pada tahun 1989, Kumpulan Jemaah Islamiah (JI), Daulah Islamiah (DI) dan Al-Qaeda. Pengalaman dan kemahiran dalam program pemulihan inilah yang digunakan dalam menangani ancaman terbaru iaitu kumpulan pengganas Daesh.**

**Untuk makluman Ahli Yang Berhormat, Kerajaan sentiasa berusaha untuk menambah baik kaedah dan modul yang digunakan dalam program pemulihan. Ini termasuk memperkenalkan Modul Pemulihan Orang Tahanan Akta Pencegahan Keganasan 2015 (POTA 2015) yang mengandungi 18 sub modul dan 102 tajuk ceramah yang meliputi silibus keagamaan, psikologi, keselamatan, kenegaraan dan nilai-nilai murni yang merupakan hasil kolaborasi Agensi - Agensi Kerajaan seperti Kementerian Dalam Negeri, Polis Diraja Malaysia dan Jabatan Penjara Malaysia.**

**Modul ini telah diterjemahkan ke dalam tiga (3) bahasa iaitu Bahasa Inggeris, Bahasa Arab dan Bahasa Perancis dan telah diedarkan negara-negara asing yang berminat mempelajari pengalaman dan kepakaran Malaysia dalam menjalankan program pemulihan tersebut.**